

皇明遺民傳書後

羅繼祖

此乾隆中三韓某氏撰次。近人江陰魏氏建功客韓。得傳鈔本於市上。景印行世者也。出韓人乎。且上距明亡百數十年。而內明外清。署曰皇明。編中皇明皇朝字。屢見不一見。又書三藩紀年。卷帙孟森序。謂韓人自命箕子遺裔。耻臣異族。故忠明之念。歷久不渝。舉編中所謂大報壇萬東祠。與夫官李如松如柏之孫。立如松如梅爲不祧之祀作證。然則皇明之署。宜矣。俞蔭甫春在堂隨筆亦云。韓人宋相琦神道碑。稱公生於崇禎丁酉十一月二十日。其子跋所箸玉吾集。稱崇禎三庚辰。知彼國在我朝定鼎之初。尙不奉大清年號。而仍以崇禎紀年。崇禎丁酉。爲順治十四年。其卒年癸卯。實雍正元年。其孫所稱三庚辰。則乾隆二十五年。王葆心蘄黃四十八皆紀事自注。則云嘗見韓人所著南明書。其中以正朔予安紹諸帝。是編毋亦其類歟。書成逾百年。其國人無爲刊行者。乃假手魏氏而顯。冥冥中殆有數存。魏氏不能遽斷撰者爲願爲明臣之韓人。抑逃爲韓人之明臣。按首

陽稿餓之士。託身與國。不觸憲網。宜若可藉風雨之嘯鳴。抒禾黍之積慟。然明亡久矣。殷頑周子。未必能從容老壽。奮筆百年之後。況編中於韓王。皆謹書廟號。又曰今上。曰當宇。其出自韓人。了無疑義。遺民有傳。蓋肇自元吳立夫桑海遺錄。今書亡序存。明程篁墩。作宋遺民錄。探謝臯羽以下。纔十一人。李小有朱不遠陳士業。並有廣宋遺民錄之輯。李書甄探博。而不能無誤。朱書。顧亭林序之。謂至四百餘人。視篁墩原書。倍蓰以上。與陳書並不傳。其踵傳明遺民者。則有若黃太沖思舊錄。陳定生山陽錄。邵念魯明遺民所知傳。彼皆親涉世局。身爲遺民。雜記師友逸行。以寄寤思。非有意撰著。仁廟以還。迭興大獄。不肖者。藉端羅織。士夫重足惕息。噤不敢聲。而全謝山。獨以詞垣爲望。不事進取。遠纂深寧。近揖南雷。以表操節義爲已任。甬上故有仍之鄉。支吾蜃宮蠓屋間。前仆後繼。九死靡它。當時不乏記載。中遭銅禁。殘廢百一。山崖屋壁。匿不

敢出。全氏耳熟庭聞。益以鉤稽探索之勤。結埼一集。遂爲東南半壁文獻託命。當世顧無指目及之者。前此戴南山。雅負史才。竟擢顯謬。殆有不幸。嘉道咸同間。若張春冶。楊傳九。徐粹舟。夏謙父。李悉伯。傅節子。戴子高之倫。咸留心晚明文獻。各有論著。造詣有淺深。而訂譌求是。表徵章隱。類能推衍謝山餘緒。一言一行。闡揚恐後。猶謝山志也。李補堂著獻類徵。錢衍石碑傳集。至舛遺逸一門。甄錄率數百人。方諸往葉。侈矣。光宣之際。海上有痛史之刻。遺民錄之輯。以孝文徵獻之業。爲取寵阿好之具。別有用心。非謝山初旨。且所錄凡五百二十三人。而不注出處。並所引書目無之。中如以張鹿徵張怡爲二人。準此之失。蓋不勝指。搜討縱博。榛楛勿翦。此編凡錄六百五十六人。視彼更贏。首冠所引書目。下及四庫全書總目大清一統志。大抵人人所習見。然而同一書也。人人取之。不必盡同。如卷一朱誼斗傳。稱誼斗字子斗。故永興府奉國中尉。爲人孝弟忠信。以詩文爲關中士人領袖。子存杠存柘。存柘殉李自成難。存杠扶父。逃之村墅以免。甲申後十一年卒。年八十。卷二范養民傳。稱養民崇禎十七年爲東宮侍讀。讀書好楚辭諸子及經史。多所涉獵。李自成挾東宮二王

以去。養民知其必西奔。於是棄其家。走關中從之。東宮不知所之。徒步入華山爲道士。結廬於西峰之左。名曰復菴。起居其中。乃據亭林集中朱子斗詩序。復菴記二文。而引用書目顧缺之。亭林孤介。少所許可。然子斗爲宗人中。有文而知恥者。故爲序其集。養民一中涓耳。國亡逃於黃冠。與王承恩。生死異趨。志節無忝。故遊華。嘗宿止其庵。而爲之記。皆後人傳遺民者。所不當遺也。亭林母夫人。斷指療姑。撫孤守志。聞兩京破。以曾受國恩。義不可辱。訓子隱居讀書。無仕二姓。而以絕粒死。亭林與史館諸君書。所謂共姜之葬。特志於春秋。漆室之憂。獨傳於中壘。以閭幽望之史氏。今明史列女有傳。而諱國亡絕粒事。茲編則據亭林書語。直書之。又如懷宗旣殉國。遺臣方媚賊不遑。無哭臨者。獨順天府昌平州署吏目趙一桂。糾草莽孫繁祉等。歛錢營葬訖事。世不知之。至康熙間。譚舟石。始於州署吏牘中得其事。茲編亦據舟石肅松錄。爲一桂立傳。一桂本末雖未詳。然即此一舉。已足着當世士。而當際諸唐林之列矣。綜上數事。知撰者筆削。具有微旨。非徒以稗販鈔撮爲能事。至范氏。養民其名。李蔭伯華獄志。謂字上古。號湘濱。襄陽人。劉繼莊廣陽雜記。稱

爲范上右。右疑古之譌。記其與王山史游。賦詩有非求不死樓名嶽。有媿貪生遠帝宸句。語絕悽痛。撰者未見二書。故拮據不及。若其疎舛。亦可得言。別史所以輔翼正史。體各有當。若錢龍錫。錢士州。黃景昉。吳姓。鄭三俊。李長庚。熊明遇。解學龍。許譽卿。金光辰諸人。位望通顯。事具正史。不必更爭遺民之席。倘有逸行。爲史氏所遺。不妨特筆表襮。今第割裂傳文。取充卷帙。斷制可議。宋徵璧入清膺薦。授祕書院撰文。中書後從征舟山有功。陞潮州知府。卒於任。見奉賢志。亦誤爲立傳。朱之瑜號舜水。餘姚人。則以爲明宗室。舜水人。朱容重則書爲重容。朱茂暉茂曙茂皖兄弟。故相國祚後也。則雜諸卷首帝裔。一若以姓類別。文稱父名從簡。則以爲名明。而不知明爲其祖諱。祁理孫班孫兄弟。王寅以與慈溪布衣魏耕祕謀被逮。班孫論戍。則以爲癸卯羅吳炎等獄戍邊。戒顯爲太倉王瀚。號晦山大師。則以爲雲南人。號晦堂。李號覃溪。官侍御史。李下有闕字。按其人。當是灌溪侍御模。既誤其字爲覃溪。又獨闕其名。所不可曉。而大謬者。則傳及龔鼎孳之妻童。以余澹心板橋雜記。記童有我受兩朝封浩。清朝恩典可與顧太太語也。孟森謂其采摭別有蹊徑。實則閨房談助。

何與大節。以視洪承疇母之痛責子過。不受迎養而歸。韓世琦母之終身不入子衙署者。可同日語乎。又有襲原文而失辭者。如亭林朱子斗詩序。稱子斗長子伯常。年六十有三。溫恭愼慎。以求全於世。惟恐人目之爲故王孫。反不若庶姓之人。猶得盱衡扼腕。言天下事。於朋友之前。而無所忌。此用其語。而節去反不若庶姓之人句。及猶得字。文義遂抵牾不可通。亭林瞿子。中白邊黑。載之表傳。此則目以怪醜。若以應顧怪之名者。又謂兩眼俱白中外黑。不知所謂怪者謂性不諧俗。而不在貌。白中外黑。祇是瞿子。若兩眼盡然。則成何狀。思之失笑。編中譌文駁義。所在而有。或屬鈔胥之失。印行者。貴存其真。遂不復訂正。至卷末增傳明亡逃韓諸臣。若康世爵。若田好漁。若李應仁。若胡克己。若王鳳崗。若鄭先甲。允足補明朝載筆之闕。謝山表章明獻。獨詳甬上。近年東莞陳氏。撰粵東遺民錄。旁搜博涉。斷制能嚴。足繼謝山而起。湘中則有船山師友記。予嘗欲輯兩浙遺民錄。又擬搜諸家傳記所不及者。爲明獻徵遺。因循未果。會讀是編有觸。因並志之。

編中有愛鐵道人。雲南人。疑是普荷大師。大師嘗爲鍛工。見吾家藏大師山水石濤題識。顧諸書不載會號愛鐵。此亦未詳所自。